

醫案摘奇卷之三

太倉傅松元耐寒父著

長男 制然雍言校

傷寒

傷寒證最多。故不須存案。設人來就診。其脈浮細或浮緊。問其頭必重而疼。或形寒。或項強。牽引痠痛。此必傷寒也。如至其所而診。若以上脈症。本傷寒也。其或面蒼身微熱。而惡寒不徹。脈緊細。不口渴。略能食者。是傷寒之發於陰者也。其面紅身熱。無汗惡寒。脈浮數。或浮緊而不數。口渴而欲嘔者。是傷寒之發於陽者也。余每遇此等傷寒。必以仲景之麻黃湯主之。其發於陰者。佐以附子。或

細辛。其發於陽者。佐以黃連、連翹。有痰嗽者。加半夏、陳皮。有咳逆者。加蘇子、前胡。有胸脘悶者。加枳殼、厚朴。舌垢有停滯者。其脈右關必實滑。實滑者。加以消導。因表裏俱病。必表裏合治者也。其發於陽者。須防脈之弦數、洪滑、實大。必有相火伏溫。淫熱內阻。卽一二日之傷寒。若夾相火伏溫。不得妄用麻桂。卽紫蘇亦不可亂用。防日後之溫熱變劇而發斑爛也。然傷寒初見。內熱甚。脈數大。口乾煩擾。惡寒未去者。用大青龍湯治之。其不惡寒。雖脈形如平。屬溫邪治。原溫症初起。脈如平常。若相火伏熱。脈必有數實之象。不必與傷寒同語。余行醫四十餘年。每治傷寒。誠無一失。誰謂江南無正傷寒之症乎。皆因時醫不知脈學。且避重就輕。迎合病家。先

恐其虛。凡見傷寒。專用牛蒡、豆卷、桑葉、以爲發表。極重用蘇葉、防風、再重用荊芥、前胡、豆豉之類。使小病變大。重病變危。日變日凶。委之無力。此庸醫之誤人。醫道中之蠹賊也。即使仲景復出。華陀再世。與此等庸醫同行斯世。亦必受其誹謗。原夫有學之醫。千中未必無一誤。所謂智者千慮必有一失。然此有學之誤。夫人知之。而醫者亦不自諱。若庸醫之一世大誤。天知之而人不知也。所以十八層地獄中。最多醫與幕與學究之三者。

有太陽病。項背強几几。無汗惡風者。葛根湯主之。太陽病。項背強几几。反汗出惡風者。桂枝加葛根湯主之。太陽與陽明合病。不下利但嘔者。葛根加半夏湯主之。太陽與陽明合病者。必自下利。葛

根湯主之。太陽與陽明合病。喘而胸滿者。不可下。宜麻黃湯主之。所以麻黃湯爲表劑之發汗第一方。原麻黃之開表。又佐以桂枝杏仁之散解推蕩。是初病時元氣未衰之猛劑也。葛根湯以葛根宣解陽明經凝積之邪。佐以麻黃之發汗。臣以桂枝湯之解散。以和營衛。是葛根湯無杏而有白芍薑棗。因較麻黃湯爲稍遜。故葛根湯發汗爲第二方。

凡初病身熱頭痛。汗出惡風。名曰中風。原類症中另有中風一門。余故以外感之中風別之。名曰傷風。因傷寒論中本有寒傷營風傷衛而名之也。論中太陽病頭痛發熱。汗出惡風者。桂枝湯主之。陽明病。若能食。名中風。不能食。名中寒。中風桂枝湯。中寒麻黃湯。

此二字亦當以傷名之。原本論中又有中寒爲直中三陰之寒而別之。所以發熱自汗脈緩數者皆當與桂枝湯。不分太陽陽明皆主之。

麻黃湯

麻黃_{三兩}

桂枝_{二兩}

甘草_{一兩}

杏仁

_{七十粒}

葛根湯

葛根_{四兩}

麻黃_{三兩}

桂枝_{二兩}

白芍_{二兩}

甘草_{二兩}

生薑_{三兩}

大棗_{十二枚}

葛根加半夏湯

卽葛根湯

加半夏_{半升}

惟麻黃

_{須泡去黃汁焙乾}

桂枝湯

桂枝_{三兩}

芍藥_{三兩}

甘草_{二兩}

生薑_{三兩}

大棗_{十二枚}

桂枝加葛根湯

卽桂枝湯

加葛根

_{四兩}

桂枝加芍藥湯

卽桂枝湯

加芍藥

_{三兩}

小建中湯

卽桂枝加芍藥湯

再加膠飴一升

桂枝加附子湯

卽桂枝湯

加附子

一枚炮去皮破八片

桂枝加大黃湯

卽桂枝湯

加大黃一兩

桂枝加厚朴杏仁湯

卽桂枝湯

加厚朴三兩

杏仁

去皮尖五十粒

新加湯

卽桂枝湯

加人參

三兩

故桂枝湯雖有散解風邪之力。實和營衛而解肌之方也。古人亦稱散表。以桂枝與芍藥各三兩。一化汗。一斂陰。爲解散風邪之用。今如余之用桂枝五六分。輕則三四分。重則八分。白芍必以錢半爲則。皆爲從輕故也。

嘗觀今世之醫。都不敢用麻黃者。所以小病變大。重病變危。非余

之妄說也。且有治病一世從未用過麻黃亦都稱其爲和平之醫家者。諒此人未見傷寒之書也。不讀內難經不知傷寒金匱而亦治病。非催命之判官乎。又有見傷寒之變讖語結胸便結煩躁溼熱溫病之傍流臭水腹滿狂妄舌乾苔黑脈沉實大等證而不敢用確黃瀉實存陰者亦未讀傷寒論之人未讀傷寒論而欲醫病是亦勾魂使者也。

如我太倉茜城之北醫用葛根只五六分從未有用一錢者蓋不讀傷寒論故也。而且其家亦未食過葛粉也。不然葛粉可調一大碗食之何以治病之用如是之輕原本朝醫書每見論傷寒之用表散方首以麻黃爲第一次以葛根大青龍爲第二次以桂枝

柴胡爲第三。原不讀傷寒論。所以不知湯飲之方名。而誤以藥性之輕重名。故前頁以麻黃葛根桂枝列之。并計三方之權度也。施阿七年十歲。鄉閒失怙恃之小童也。六月底病。其兄邀余治。見阿七滿頭癩癩。身灼熱。不知人事。不食飲。不二便。已十日。切其脈伏。余曰。此恐落水受寒而起。是傷寒症也。其嫂云。吾叔終日淘河摸蟹。自端節後至得病。未間一日。約月餘。常在水中。先生所云是矣。余啓其唇。見斷燥舌乾。乃用大青龍湯去薑棗。用麻桂各六分。石膏一兩。杏仁三錢。甘草四分。加鮮地一兩。花粉四錢。知母連翹各二錢。一劑。明日其兄來邀覆診。問昨得汗否。云未也。今日仍如昨。余見其手持昨日之方。爲之去桂。麻加羚羊一錢五分。葛根三

錢鮮斛四錢。囑伊午前卽服。余午後至其家。見形情如昨。問其嫂云。汗果未出。切其脈。已見細弱。身熱已解。余曰。熱已解。食已進。愈矣。其嫂不信。按其身。云。熱果退矣。食未入也。且口未開。何言愈。余曰。此兒灼熱十日。清陽津液俱傷。今耳不聰。目不敏。口舌不能言。故神非昏。而實呆木也。余見昨日枕畔有乾糕十數片。今糕不見。非其食耶。其嫂爲之摸索。亦不見。云。若是果愈矣。余曰。今病雖去。人已呆木。以後食飲。須按時與之。此兒不知也。卽洩便亦須他人當心。方不污床蓐。約須半月。不知人事。幸毋忽之。再與以養胃理虛一方。囑服二劑。又令其置病人於暗室。以養目光。後果半月起床。而耳目尙未靈敏。直至一月後而復元。

溫病

內兄劉受之患溫邪症。身熱無汗不食。六七日紅斑稠密。曾用犀角、羚羊角、解毒、涼宣等法。而熱不稍退。舌胎灰黑。神亂妄言。時舅嫂滕氏。以余初行醫。未必能治重病。連請茜涇陶張二醫。每方必用鮮石斛、鮮生地、豆豉、牛蒡、丹皮、連翹、茯神、知母、花粉、夜交藤、青蒿、竹葉等。服三四劑。不惟病不退。而熱更甚。大便自傍流。變爲燥結不通。已七日。至十一日。煩躁欲狂。余曰。今當以大承氣湯。瀉熱存陰。其舌乾唇焦。實熱已極。若再延緩。則不救矣。舅嫂性復自用。堅持不允。其親鄰從余意。皆云不得不瀉。因此疑議紛爭。病者竟狂妄不甯。舅嫂乃曰。若能担保。則服汝方。諸親鄰皆贊成之。服後

四更下一遍。黑硬如炭。天明又下一遍。黑且溱。既而自汗津津。及日中而熱解。是病也。若非親鄰明理。余無從措手。真不救矣。紹興張定方。生義燭號之學徒也。初秋傷暑。兼之飲食不節。變成熱症。屢進涼解。如水投石。生義之經理曰金裕昆。明於醫。見其病日甚一日。繼之以昏妄譫語。邀余診而告曰。此三房合一之子。不計藥資。只求其生。望先生注意。如先生有命。無不敬從。余診其脈。甚至弦數不倫。身熱微汗。而紫紅色癍如錦紋如蚊跡者稠密。舌絳唇焦。渴飲無度。便溺自通。惟不食不寐已五日。乃相與定犀角地黃。合白虎解毒三方並進。熱仍不退。明日卽加寒水石板藍根。胆星又不效。第三方用犀羚二角。鮮石斛元精石大青亦不驗。余

只得告辭。裕昆及謝把作等。重申前意。皆云。且莫辭。此兒有失。三房之香火。無繼。方藥貴重。皆所不計。請毋辭。余思涼藥之最重無比者。莫如元精石。瀉火之最猛者。莫如大黃。卽用此二味。合以犀羚二角。鮮地。鮮斛。連柏。枳。翹。大青等十一味。加濂珠三分。西黃一分。研細調服。煎藥用雪水。并以雪水代飲。午前服之。至黃昏而神亂如前。毫無善狀。只得照前方再配一劑。仍用濂珠。西黃調服。雪水代飲。并以井水浸髮。至天明。身熱乃退。妄言亦定。神體略安。舌絳已淡。脈已柔緩。卽改用安神和胃之藥。日漸向安。惟仍耳聾發瘡。乍熱乍涼。又延月餘。乃使人送回浙紹調養。十一月底始復元。重至生義燭號。

伏暑

長橋浦佩之媳。年二十餘之少婦也。夏月傷暑。延二旬而邀余治。身熱汗少。凜寒未去。穀食不進。舌絳耳聾。脈浮細數。余曰。此因暑受寒。寒在外。暑伏內。初病本傷暑。今則謂伏暑也。原外寒未去。伏暑內蒸。膈中清陽之氣。受暑熱之混蒙。故不食而耳聾也。治宜宣泄伏邪。必有白痞發出。方用香薷飲。加牛蒡、葛根、蟬蛻。一劑而汗出。痞見。凜寒去。繼之以葛根、石膏、連翹、丹皮、青蒿、知母、鮮斛、鮮地。白痞發已多。清晨熱可退。前方去葛、石地、斛。加萆皮、花粉、淡竹葉、地骨皮等三四劑。舌絳退。身熱解。惟耳聾不食如前。乃改用生薑、洋參、首烏、橘白、青蒿子、麥冬、穀芽、佛手等。白痞止。暮熱停。惟仍不

食耳聾神呆。脈緩無力。余曰。當此宜進穀食。使之胃健。其姑與母云。彼見食蹙眉搖首。不知何故。恐喉中尙有病也。余乃閉目凝思。鼻中忽覺鐵鼠氣。不可耐。復睹其首面手指。烏黑如漆。其席上之垢甚厚。曰。余知之矣。囑其母曰。汝先爲我去其席上之垢。其母云。身不能動。奈何。余囑先滌外半床。淨則以夏布雙層複蓋。移其身臥布上。再滌裏半床。淨則亦用夏布遮覆。然後洗其手面口鼻。又囑其姑煮麥粥一椀。點蓬繩數根。置床下。又觀病者。自嗅其手。似有笑容。使二嫗奉與麥粥。無幾。一椀粥盡矣。又囑從此一日三四進。能多最妙。又使其備鮮香可口之菜。但不得嘗大葷。食進後耳漸聰。神漸健。半月後起床。停藥一月復元。

滕桂芬表姪。吸鴉片煙二十餘年。其父閉之空室。逼使戒煙。不准服戒煙方法。逮秋初。患伏暑症。其父疑其詐。不與聞。旬日不食。自汗身熱。譫語妄言。其弟壽眉邀余診。曰。本因癮虛。而又伏暑。將有虛脫之險。爲之立案云。身熱自汗。不食脈濡。耳聾神呆。而發白痞。症情刻刻可危。議進扶正固脫。方用洋參、麥冬、山藥、扁豆、青蒿、連翹。或加鮮地、鮮斛。或加桑葉、蟬蛻。或加辰神、棗仁。或加牡蠣、五味。或加胆星、烏梅。或加川貝、白芍。前後增損三十餘劑。未嘗用一散解。白痞止。身熱解。妄言已。自汗收。穀食漸進。漸增。癮亦除。而未曾用過粟殼。遵其家訓也。

伏暑傷陰

朱家婦。年四十餘。患傷暑半月餘。經三人醫治無效。其甥王某來邀余診。身熱脈細數。初起有微汗。近五日雖表無汗。不食不渴。神靜厭煩。惟默睡而不能適寐。令其啓口。舌赤如血。咽乾紅痛。余曰。症已熱傷真陰。恐難挽回。王云。前醫亦云難治。因屢表無汗。辭未立方而去。惟病者爲我長親。本孀居。回家則侍奉無人。今不得已。擬送歸。恐不能達於其居。若病歿於此。又多不便。故請先生一決之。如可不死。此間應得侍奉。余曰。若送歸。病者自知不活。病已甚矣。再加焦急。難免路中無事。察其氣象。今夜必不死。且試一方。候明日定行止可也。王云。若是亦好。余乃立方。以川連、鮮地、鮮斛、淡芩、元參、赤芍、阿膠、麥冬諸味。用井水煎。雞子黃調入服。明日來邀。

覆診。王云昨服藥後。雖仍無汗。卽得安寐。但覺後大聲叫苦。余切其脈。數已大減。身熱退未肅清。舌紅已淡。咽痛已除。余曰。挽回矣。今日遷也可。不遷也可。後遷歸其本家。調養一月。卽不復服藥。此等證若再使其出汗。未有不死者也。

伏暑虛煩

姚懋齋夫人。年五十餘。質弱。秋初感冒。致身熱乍寒。胸宇煩悶。厭食泛噁。脈輒微數。舌紅苔剝。已六七日。余曰。虛體受涼。伏暑邪甚。候有淹纏之勢。原紅舌白剝。防其變端。先以和表清暑治二劑。畏寒雖退。而綿熱不解。穀食甚少。而心煩寐短。改用煨葛根、川朴、黃連、丹皮、連翹、青蒿、法夏、橘白、佛手。又二劑。略見白痞。身熱去其大